

四庫全書

史部

欽定四庫全書

史部

江西通志卷五十八

詳校官監察御史臣左周

檢討臣德生覆勘

總校官知縣臣楊懋珩

校對官典簿臣劉景岳

謄錄監生臣龔輝遠

欽定四庫全書

江西通志卷五十八

名宦

統轄

明

鄧愈虹人初名友德年十六出戰必先登陷陣軍中服其勇取江西以愈為行省叅政守之陳友諒寇南昌愈固守凡三月太祖親征解圍愈與常遇春悉平沙

坑麻嶺諸寨進兵取吉州下贛州進江西右丞時年二十八愈簡重慎密不憚危苦持軍嚴卒有鹵掠者斬之以徇軍中所得子女盡遣還其家民大悅封衛

國公

白志

薛顯蕭人從征守南昌陳友諒來寇顯守新城章江二門友諒攻甚急顯隨方禦之間出銳卒斬其平章劉進昭以功擢江西行省叅政

同上

黃彬江夏人從歐普祥攻陷袁吉勸普祥遣使納款太

祖至隆興令普祥守袁州而以彬為江西行省普祥
故殘暴彬盡反其所為民甚安之

同上

趙德勝濠人為元義兵長馬上運槩如飛與朱文正鄧
愈共守南昌平羅友賢破漢將復臨江吉安撫州未
幾友諒大舉兵圍南昌晝夜攻城德勝率諸將死戰
且戰且築為流矢所中鏃入六寸即拔出之遂卒年
三十九追封梁國公謚武桓祀功臣廟

同上

陶安字主敬當塗人太祖取太平安出迎初命知黃州

尋知饒州陳友定兵攻城督吏拒守援兵至敗去諸將欲屠從寇者安曰民為所脅奈何殺之不許太祖賜詩褒美民為建生祠尋又命安為江西行省叅政諭曰江西上游地撫綏莫如卿安辭不許至江西政績益著其年卒於官

同上

丁豫字叔寬海鹽人洪武初以儒術聞聘入京太祖召見問天下治否對曰盜賊已息但恐復生今日之治願以安民為本稱旨授江西按察使詳刑慎法澤被

於民民頌之不衰

南昌府志

李思聰湖廣桂陽人洪武中為江西布政司叅議廉介
自守學行俱優興學校創貢院士林躋之

明一統志

韓宜可字伯時浙江山陰人元至正中行御史臺辟為
掾宜可拒不行洪武初薦授山陰教諭擢御史丞相
胡惟庸御史大夫陳寧中丞涂節侍帝坐方從容燕
語宜可直前出懷中彈文劾三人險惡似忠奸佞似
直恃功怙寵內懷反側乞斬其頭以謝天下帝怒曰

快口御史敢排陷大臣耶命錦衣衛監問尋釋之出
為江西按察司僉事時官吏有罪者笞以上悉謫屯
鳳陽毋慮萬數宜可疏爭之帝是其言後坐事將刑
御謹身殿親鞫之天晴無雲忽雷火繞殿中帝驚曰
得無枉是人耶宜可遂獲免復疏陳二十餘事皆報
可官至左副都御史

白志

解敏洪武中按察使性剛毅務學明敏以古人自期超

拜右都御史

明一統志

按林志敏陽武人洪武進士任江西按察政聲著聞

房安洪武中為按察使有守有為為崇儒重道旌善懲惡吏民咸服聲譽赫然

同上

按林志安字子靜汝陽人洪武中由國學生授北平按察僉事陞江西按察使官至工部右侍郎

周觀政山陰人洪武中薦授九江教授擢御史嘗監奉天門有中使將女樂入觀政止之中使愠而入出報

曰御史且休女樂已罷不用觀政曰必面奉詔帝親出宮謂之曰宮中音樂廢缺欲使家內肄習朕已悔之御史言是也左右無不驚異者永樂初出為江西按察司僉事遷本司按察使

白志

按明一統志周觀政作周觀洪武末為按察使稟性剛直彈劾不避權貴在任振肅風紀百度維新吏民畏之

劉辰字伯靜金華人太祖下婺州首謁署典籤永樂初

預修太祖實錄遷江西布政司左叅政奏蠲九郡荒田糧歲饑勸富民貸饑者蠲其徭役以為之息官為立券期年而償居官廉勤尚氣與同官不相得數爭坐免歸起刑部右侍郎

同上

張本字致中東阿人洪武中以國子生授江都令永樂中由揚州知府擢江西布政司右叅政永樂四年召為工部左侍郎本性廉介成祖宴近臣銀器各一案因以賜之獨本案設陶器諭曰卿號窮張銀器無所

用本頓首謝其為上知如此

同上

何穎武陵人由進士為江西按察僉事永樂七年九月
江西妖賊李法良行彌勒教流入湘潭聚眾為亂事
聞遣豐城侯李彬發兵勦之法良遁至吉水縣縣民
執以獻械送京師誅之時有司捕法良黨多所連引
穎悉與辨理無濫及者人咸德之

豫章書

顧佐字禮卿太康人建文二年進士永樂中由御史遷
江西按察副使剛直不撓吏民畏服及召為應天尹

人比之包孝肅云佐守正嫉邪人敬憚之每旦趨朝直廬獨處非議政不與諸司羣坐人稱為顧獨坐

白志

邵圮字以先永樂四年進士授御史巡按江西所過人不敢犯圮持身廉內行修潔母喪哀毀芝再產於庭官至南京左副都御史

同上

柴車字叔輿錢唐人永樂二年以舉人授武選司員外郎從帝北征遷江西右叅議時以采木入閩經廣信廣信守故人也餽蜜一罌發視之乃白金笑曰公不

知故人矣却不受其介類如此

同上

顧巽字與權慈谿人永樂壬辰進士文皇帝親選方面授巽江西按察僉事公廉仁恕民隱無不上聞大理卿夏時正稱之曰俸無十金之積可方古之廉吏

南昌

府志

賈諒字子信永樂中由鄉舉入太學選侍皇太孫擢給事中宣德中拜右副都御史巡視江西按治豪強不少假諒內行修當官有風采士類稱之

白志

蔣忠鳳陽懷遠人父原永平衡百戶忠襲職陞永清衛千戶以北平軍功陞江西都司都指揮同知先是守將多貪墨縱士卒為盜民久苦之忠至申明軍律取其無賴者繩之以法由是民賴以安永樂十一年卒

於官

豫章書

陳憲字廷章定海人永樂進士授御史巡按江西南昌府屬舊苦三司供億憲悉革去民便之吉安所千戶臧清橫甚都司庇之他官莫敢詰憲廉得清殺一家

無罪三人執訊辭伏械至京正法時稱為名御史

南昌

府志

史克新永樂中任江西按察副使剛方正直發奸摘伏

如神巡歷所部淹滯無遺卒於官聞者流涕

明一統志

焦宏字克明葉縣人永樂進士除御史陞江西按察副

使持法平允訟獄一清陞右布政益務寬大九江例

輸蘆柴而非其土產民甚困宏奏免之新南昌府學

復濂溪書院振拔寒士薦擢下吏政聲甚著召為戶

部右侍郎

南昌府志

陳智字孟機咸寧人永樂進士授御史歷江西左布政使廉能剛果適永豐曾子良亂智捕戮其渠餘皆散

去

林志

林瑜字子潤龍岩人永樂中任江西按察僉事行部贛州豪民索逋殺人賄誣姪殺伯母獄已具瑜廉得其實寘豪民於法安福有劇盜未獲奸民誣為富家所匿瑜廉得真盜富家得釋陞本司副使表接長沙境

流民為寇奉檄往治之殲其渠魁餘黨悉撫定嘗督造戰衣一百萬責以三月如期而集居江西二十餘年滿去百姓爭遮留之

同上

陳燧字廷嘉臨海人永樂進士以翰林檢討養疾家居起廣西提學僉事復除江西教諸生以講學為務以實踐為先士皆振奮以乞休歸

南昌府志

趙新字日新富陽人永樂初由國子生授工部主事擢吏部郎中晉吏部右侍郎巡撫江西綜核吏治使百

司無廢務至以漕淮之舟運西江之粟兵農兩利民
甚便之官至吏部尚書

安志

石璞字仲玉臨漳人永樂九年舉於鄉入國學選授御
史英宗即位遷江西按察使璞善斷疑獄民娶婦三
日歸寧失之婦翁訟壻殺女誣服論死璞禱於神夢
神示以麥璞曰麥者兩人夾一人也比明械囚趣行
刑囚未出一童子窺門屏間捕入則道士徒也叱曰
爾師令爾偵事乎童子首實果二道士匿婦槁麥中

立捕論如法在江西數年風紀整肅雖婦豎無不知
石憲使者歷山西布政累官南京左都御史

白志

張翼秦安人永樂中鄉舉以監察御史巡按江西會歲
大侵孳殍相屬於道翼繪圖懇切上疏請賑之為發
帑金數十萬所甦活者甚多又沿江岸地多斥鹵可
田有司憚於開墾翼為處給牛種鑿渠開道灌田萬

餘頃民以殷富

陝西通志

夏時字以正錢塘人永樂進士授給事宣德初一日三

上封事稱旨命署尚寶司尋擢江西僉事正統三年
奏守令多刻刑無辜傷和干紀乞令御史按察司官
徧閱罪囚釋冤滯逮按枉法官吏從之遷叅議奏恤
民六事多議行擢廣西左布政使

白志

王翺字九皋鹽山人永樂十三年登第改庶吉士英宗
嗣位廷議文武大臣出鎮守翺以右僉都御史偕都
督武興鎮江西懲貪抑奸吏民畏懷正統二年召還
累官至吏部尚書

同上

按明一統志宣德中翺以都御史鎮守江西剛果
孤介斂華就實處事平易而吏民自懼臨下雖寬
裕有容而觸奸犯法不少貸刑清政舉一方晏然

原跋

于謙字廷益錢塘人永樂十九年進士宣德初授御史
出守江西雪冤囚數百人帝知謙才可大任手書謙
名授吏部超遷兵部右侍郎後土木之變有再安社
稷功歷官兵部尚書加少保尋為石亨等所害死之

日陰靈四合朝野冤之弘治初特進太傅謚肅愍賜祠萬歷中改謚忠肅

同上

王鈺字孟堅諸暨人永樂進士官編修宣德中修兩朝實錄書成引疾歸正統初起江西提學僉事鈺正身率物大小各有造就長河洞氓聞其賢亦遣子入學考績至京與當道不合致仕去

南昌府志

楊寧字彥謚歙人宣德進士授刑部主事機警多才能蔚有時譽正統間以刑部侍郎鎮守江西時閩浙盜

起賊至輒擊敗之暇則詢民瘼士民嚮服景泰初召拜禮部尚書

白志

按林志安志楊寧俱作錢塘人

李齡字景齡潮陽人宣德鄉舉歷御史陞江西提學僉事崇雅黜浮痛抑奔競復白鹿書院聘胡居仁主教為學者師謹於自持言動不苟人或欺之亦篤信不渝被讒而去時論惜焉

林志

張文昌江安人正統間任江西按察使天性慈厚未嘗

妄撻一人輕入一罪吏民服而愛之

南昌府志

張居傑字翰英上虞人正統鄉舉由吏科給事累官江西左叅政軍屯田賦措理得宜人沐其惠以最遷山

西布政使

同上

韓雍字永熙長洲人正統七年進士授御史負氣果敢以才略稱巡按江西黜貪吏五十七人廬陵泰和盜起捕誅之景泰初以右僉都御史巡撫江西首行均徭法編冊輪役一勞九逸又行歲辦法里甲公貯銀

兩有役則估費召戶領解民皆便之敏達善斷凡規畫措置咸可為後世法歲饑奏免秋糧請文天祥謝枋得謚歷官兵部侍郎卒年五十七謚襄毅兩廣江右民立祠祀之

白志

周鑑字孔明麻城人正統乙丑進士授監察御史出按江西有大學士陳循子所為不法鑑置大辟陳切齒同以中之無所得已諷部遷雲南副使

湖廣通志

原傑字子英陽城人正統十年進士授御史巡按江西

捕誅劇盜奸宄斂跡尋擢江西按察使發寧王奠培
淫亂事革其護衛治行聞賜誥旌異遷山東左布政
成化間江西盜起以傑嘗再莅其地得民心詔往治
之捕戮六百餘人餘悉解散拜左副都御史巡撫鄖

陽

白志

夏堦字宗成天台人景泰二年進士授御史清軍江西
發鎮守中官葉達恣橫狀達為斂威累遷江西左布
政使巡撫四川年未五十即求退杜門不接賓客

同上

陳選字士賢臨海人天順四年會試第一授御史巡按
江西盡黜貪殘吏時人語曰前有韓雍後有陳選廣
寇流入贛州奏聞不待報遣兵平之憲宗即位嘗劾
尚書馬昂等一時憚其風采歷廣東左布政市舶中
官韋春誣奏被逮士民數萬號泣遮留使者辟除乃
得出抵南昌疾作卒於石亭寺編修張元禎為治喪
殮之弘治初主事林沂疏選冤詔復官謚忠愍

同上

夏寅字正夫華亭人正統進士授南京吏部主事進郎

中成化間遷江西副使提督學校其教務先德行士
經激勸者多為聞人嘗語人曰君子有三惜此生不
學一可惜此日閒過二可惜此身一敗三可惜世傳
為名言後以浙江右叅政致仕

同上

翁世資莆田人正統進士除戶部主事歷郎中成化初
擢江西左布政使大軍征兩廣轉江西餉需十萬人
世資議齎直就易領南米民得不擾

同上

余複字存美遂安人正統進士授御史陞江西按察僉

事時巡撫韓雍患賦役厲民委複均之剗革夙弊民
歡若更生督理各郡京漕措置有方晉副使長河峒
賊朱紹綱謀叛郡縣騷複往贛督兵討之生擒紹
綱等七十餘人賊遂平事聞賜綵幣寶鈔陞福建右
叅政復陞江西按察使轉布政使卒於官

南昌府志

孫遇字際時福山人正統進士授戶部主事累官江西
右布政使宅心仁厚愛民如子不為皎皎之名而操
持凜然不可奪嘗罷西山紙廠以甦民累人尤德之

同上

何宜字行義福清人正統進士由職方司郎中歷江西左布政使性澹約若貧士入覲載小舟隨從數人而已尤謹密簿書一字不輕置時王克復為叅政書判如流恒以細屑戒宜宜安之然俱以政事顯名

同上

張綱字大振長清人景泰進士授監察御史天順間曹吉祥用事欲庇一指揮以孽奪嫡綱疏奏阻之人重其風節出按江西勘寧王奠培不法削其護衛屢擢

右僉都御史

豫章書

林鶚字一鶚太平人景泰進士授御史成化初遷江西按察使有犯大辟賄達官求生者鶚執愈堅廣寇剽贛州急調兵禦之遁去廣信妖賊妄稱天神惑衆捕戮其魁立解散歷左右布政使歲饑奏減民租十五萬石成化六年擢南京刑部右侍郎卒贈尚書謚恭

肅

白志

夏時正字季爵仁和人正統進士除刑部主事成化五

年以大理寺卿巡視江西災傷除無名稅十萬餘石
汰諸司冗役數萬奏罷不職吏二百餘人增築南昌
濱江堤及豐城諸縣陂岸民賴其利嘗上書不具齊
奏人姓名吏科論其簡恣遂乞休歸僦居民舍布政
使張瓚為築西湖書院以居之年近九十而卒

同上

閔珪字朝瑛烏程人天順進士授御史出按河南以風
力聞成化六年擢江西副使久之以右僉都御史巡
撫江西南贛諸府多盜率強宗家僕為之與主珪請

獲盜連坐由是貴宦不悅尹直輩謀之李孜省賁珪不能弭盜左遷廣西按察使累官兩廣總督刑部尚

書謚壯懿

同上

徐懷字明德建德人天順進士授刑部主事歷江西按察僉事明敏有治才安福豪陳萬年恃險為雄號曰洞主官司莫敢詰懷密擒伏法累擢江西右布政使轉左仕至南京刑部右侍郎

南昌府志

王恕字宗貫三原人正統進士為揚州知府天順四年

以治行最超遷江西右布政使平嶺冠贛州操履端
正弘治間巡撫雲南累官吏部尚書卒謚端毅

白志

陳煒字文曜閩縣人天順進士授御史廷劾指揮門達
寘之法中外快之遷江西按察副使斥貪殘振頽靡
威望大振陞右布政使時宗藩府第墳塋之費賸取
不經煒條奏殺三之一轉浙江左轄未赴卒於任

林志

崔恭字克讓廣宗人天順進士歷官江西左布政使發
奸民冒闕廣濟庫銀五十萬作均徭法任一歲之勞

者有九年之逸民甚便之寧王奠培與弋陽王奠燼
交構恭會三司覈實以狀上王銜之又欲增造宮殿
及派歲祿於近府縣恭不從護衛軍校有犯輒治之
陞右副都御史巡撫蘇松

安志

吳一貫字道夫成化進士由上高知縣擢御史以彊幹
聞擢大理右寺丞左遷江西副使討華林賊有功進
按察使行軍至奉新卒士民立祠祀焉

白志

按明一統志稱一貫督兵勦捕嚴申令信賞罰士

卒奮勇倬斬甚多建議築城賊至則督戰賊退則築城至忘寢食以勞瘁卒

楊守隨字維貞鄞人成化進士授御史巡按江西所至以風采見憚累官工部尚書掌大理寺上章極論劉瑾奸狀瑾深銜之致仕歸尋除名瑾誅復官贈少保謚康簡從弟守隅由進士歷官江西叅政有政績寧府祿米石徵銀一兩後漸增十之五隅入請於王裁減如舊以瑾惡守隨并罷守隅官瑾死後起官終廣

西布政使

同上

段正字以中澤州人成化進士由元城知縣擢御史巡按江西賑饑備盜頗有方略遷江西左叅政精於吏治撫州糧長為民害立除之追贓數萬廣信苦夫役繁以寺觀租稅贏餘者使出傭直民困少甦平生廉介卒之日無以為殮士大夫皆哀之

安志

蘇葵字伯誠順德人成化進士以翰林編修出為江西提學僉事性剛介不苟合為鎮守太監董讓誣奏被

繫遣法司盛洪等訊之將加刑南昌諸生數百人排
闥而入擁葵去事竟得雪修白鹿書院增置田廬招
徠諸郡學者與前督學李齡媲美焉遷福建右布政
使

南昌府志

陳金字汝礪應城人成化進士正德間江西盜起詔金
總制軍務便宜從事當是時撫州則東鄉賊王鈺五
等南昌則姚源賊汪澄二等瑞州則華林賊羅光權
陳福一等而贛州則大帽山賊何積欽等官軍累年

不能克金調廣西兵以次削平半歲間俘斬千七百餘人即東鄉立縣并立萬年縣招降人居之每奏捷壘書嘉勞加官少保進太保廕一子錦衣百戶

白志

蔡清字介夫晉江人成化進士乞假歸講學僧寺謁選得禮部主事調吏部尋以憂歸即家起江西提學副使寧王驕恣凡朔望諸司先朝王後謁文廟清不可先廟而後王王生辰令諸司以朝服賀清曰非禮也去蔽膝而入其取士先德行而後文藝旋引疾去清

平生飭躬砥行不愧衾影以虛名齋所著易經四書

蒙引行於世卒謚文莊

同上

林俊字待用莆田人成化進士弘治間為南京右僉都御史督操江適江西新昌民王武為盜巡撫韓邦問不能靖命俊巡視身入武巢武請自効悉擒賊黨詔即以俊代邦問巡撫乃更定要約庶務一新去淫祠建義倉修學校鋤強扶弱風紀凜然王府歲徵祿率倍取於民以俊言大減省寧王宸濠貪暴俊屢裁抑

之王請易琉璃瓦費二萬俊言宜如舊毋涉叔段京
鄙之求吳王几杖之賜王怒伺其過無所得會俊以
聖節按部遂劾奏之停俸三月尋以母憂歸正德初
江西人在朝者合疏乞還俊乃命再撫江西累官刑
部尚書卒謚貞肅

同上

史琳字天瑞餘姚人成化進士授給事中叅議江西吉
安民殺其鄰子晝夜移屍道傍死者家莫知所由訴
於琳跡之弗得乃禱於神果得凶首遂輸服贛盜起

勢張甚琳督捕斬七百餘人釋諸脅從境內以寧陞
布政使仕至右副都御史

安志

趙敬字叔成常州人景泰進士以御史出按江西成化
四年上言江西俗健訟有司官稍不順情者動輒捏
詞告害風憲官用意深刻者惟欲張威干譽不復顧
惜人才一槩逮繫甚至刁民自知誣告潛避終不結
案請嚴禁報可通行各省遵行尋陞敬為江西按察
使因敬按江西將代值歲荒戶部請敕賑濟候事竣

代江西士民上奏懇留遂有是命

豫章書

邵寶字國賢無錫人成化進士弘治七年以戶部郎中
遷江西提學釋菜周元公祠修白鹿書院其教以致
知力行為本江西俗好陰陽家言有數十年不葬父
母者寶下令士不葬親者不得與試於是相率舉葬
以千計寧王宸濠索詩文峻却之後宸濠敗有司校
勘獨無寶跡遷浙江按察使仕至南京禮部尚書卒

謚文莊

白志

吳廷舉字獻臣梧州人成化進士用馬文升劉大夏薦擢廣東僉事正德初發鎮守太監潘忠二十罪謫戍雁門劉瑾誅楊一清薦其才起江西右叅政敗華林賊於連河討桃源賊設奇制勝執其酋破之陞廣東右布政使擢右副都御史寧王宸濠構逆有端疏陳江西軍政六事為預防計世宗立召為工部右侍郎至南京工部尚書卒謚清惠

白志

金澤字德潤江寧籍鄞人成化進士累官都察院副都

御史時因廣閩寇入贛州廷議以風力大臣為總制
澤奉敕撫定便宜從事嚴督緝捕斬賊首滿天明等
八百餘人於是奏添設府縣捕盜官尋陞兵部侍郎

林志

周南字文化縉雲人成化進士弘治初歷江西右布政
使擢巡撫大同引病歸明年起督南贛軍務南贛巡
撫之設自南始大帽山賊攻剽城邑延及江西數年
不靖推官莫仲昭知縣蔣璣指揮楊澤被執賊勢愈

熾南集諸道兵擊之擒賊首張時旺捷聞賜敕獎勞
南復移師會總督陳金共平姚源諸賊境內遂寧進
右都御史總督兩廣踰年歸卒贈少保

白志

張嶺字時峻蕭山人成化進士授上饒縣遷南京兵部
主事正德初忤劉瑾勒為民瑾敗起知南雄擢江西
叅政進右布政使舉治行卓異遷左寧王宸濠欲拓
地廣其居嶺執不可大恚使人餽之發視則棗梨薑
芥也嶺悟其指曰是欲我早離江界也未幾召為光

祿卿以右副都御史巡撫保定

同上

錢山字靜夫滁州人成化丙戌進士擢御史陞江西僉
事行部豐城會大水民饑山不俟請即發倉粟賑之
所活甚衆仕至副使

江南通志

沈銳字文進號省齋仁和人成化己丑成進士江西按
察僉事擊服豪右貪墨吏悉解綬去尤孳孳以興學
化民為務重修白鹿洞書院講道不輟轉廣東僉事

王有恬字德安長樂人幼穎慧好學成化乙未進士歷南戶部郎中陞江西督糧叅議先時民逋稅皆由豪宗攬任代輸有恬至下令釐革淮王就封道經九江水陸費鉅萬有恬酌省其半後歸杜門三十餘年窮

約澹然

福建通志

張璫字廷璧平彞人成化進士弘治初南贛閩廣盜起擢璫江西兵備副使建七縣城堡積糧糗練士卒修器械設險隘人賴以安與上官論不合拂衣去盜復

起巡撫鄧廷瓚奏南贛不可無璉詔留之遂築南康城盜立解散尋以疾辭歸璉剛正不阿盤錯立斷墨吏斂手及歸橐中蕭然

雲南通志

王奎字文明武進人弘治壬戌進士選南御史陞江西按察司僉事有德興尹恃輿援素貪墨卒按其奸既勦桃源洞叛寇俘馘甚衆三載例應考績巡撫以私怨沮其行時奎在軍中久竟抑鬱以卒

江南通志

黃昭道字又顯吳江人弘治己未進士正德初為御史

論劉瑾等杖三十除名遂成跛瑾誅擢江西按察時
宸濠蓄逆謀招亡命刼彭蠡諸處為患昭道捕獲數
百人訊治如法進山東巡海副使勦捕海寇平反冤

獄擢雲南布政

同上

李蕙字德馨當塗人成化進士授給事中陞江西叅政
歲饑上饒民亂郡以行刼報蕙議止戮其渠南贛盜
起發兵勦之吉安城樓戍舖皆其改置官至總督漕

運都御史

林志

李情字宗善靈寶人弘治進士歷御史江西按察副使
時萬年縣甫設桃源洞降賊王重七等復叛情方備
兵饒州駐萬年覘者告宜急避情誓以死守變作遂
遇害贈按察使廕一子入監

安志

按明一統志云同死事者通判秦碧陳遠照磨馬
驄指揮邢世臣千戶許政等

原跋

徐讚字朝儀永康人弘治進士擢御史巡按江西勦湖
寇徐九齡等數百人時宸濠久蓄異謀潛結羣寇以

自樹讚翦其羽翼之勁者累官至工部右侍郎

南昌府志

董傑寧國人弘治丁未進士以副都御史巡撫江西時
宸濠反形已具屢餽遺傑拒不受時以忠義諷諭濠
知不可奪每朝見輒留飲忽一日飲歸謂家人曰吾
今日飲寧王酒頭暈腹脹豈有異物耶次日歿徧體皆
赤家人皆知為中毒不敢言繼之者即孫忠烈也所
著有儒行辨五城集

豫章書

趙鉞任南昌衛指揮使以捕盜功陞都指揮僉事守備

南贛正德六年充叅將督兵勦馬腦華林山賊俘獲甚衆時逆濠暴虐軍民憾鉞執法不從已十年三月召入府飲之策馬歸毒發死濠復繫其妻孥掠其資財鉞死四日不得殮蒙禍甚慘方濠虐燄熏天百司附之鉞以武弁獨與之抗亦賢矣哉

同上

按豫章書又載指揮僉事戴宣以廣東守備過家未及謁濠捕篋死寧府長史王用才以同議撫按官見王府不具朝服事亦死於械繫

原跋

李夢陽字獻吉慶陽人弘治進士官江西提學副使振作士氣風教大行淮王府校與諸生爭夢陽答校王怒奏之未下巡按御史江萬實亦督責諸生夢陽手銀鐺率諸生往鎖之萬實走免而淮王奏適下遂以冠帶閒住江右士子至今猶思之

白志

周憲字時敏安陸人弘治進士官江西副使華林馬腦賊方熾奉總督陳金檄勦禽數百人移軍奉新計擒賊首平馬腦寨進逼華林賊窘遣諜者詭言饑困狀

憲信之移檄會師來擊他將多觀望憲攻北門賊少
却與子幹先登逼之賊下木石如雨軍潰憲中槍幹
前救力戰墮厓死憲被執為賊支解事聞贈按察使
予祭葬謚節愍廕子錦衣百戶旌幹門曰孝烈

同上

王哲字思德吳江人由進士任御史巡按江西風采峻
整燭奸如神宸濠方橫亦凜肅不敢或忤民謠曰江
西有一哲六月飛霜雪天下有十哲太平無休歇後
陞僉都御史巡撫江西逆濠憚之嘗投以鴆不死遂

以疾乞歸卒於家

林志

穆相字伯寅三原人正德進士巡按江西劾鎮守中官

黎鑑風采屹然問俗察奸不辭勞瘁歿於寧州

明一統志

楊茂元字志仁鄞縣人文懿公守陳子成化進士歷山

東副使陞江西叅政適宸濠橫斂之初每歲誅求祿

米民弗堪命茂元率衆往納之濠憚其盛名正數外

秋毫不敢過取糧長請以羨餘貯庫茂元曰此小民

物也給還之仕終刑部侍郎

豫章書

魏英字士華慈谿人成化進士歷官江西布政使宸濠
方恣橫欲盡私南昌所屬河泊課鈔英力拒之陞貴

州巡撫

南昌府志

陳恪字克謹歸安人成化進士歷官河南左布政以才
望調江西時宸濠肆虐鉗制方面恪每議夫價賀禮
多忤其意濠怒面叱之恪處之裕如濠將中以奇禍
會陞都御史巡撫南贛以去

林志

胡世寧字永清仁和人弘治進士性剛直不畏強禦且

知兵累官江西副使與都御史俞諫畫策擒盜討平
王浩八城廣昌南豐新城時寧王宸濠驕橫有異志
世寧持疏請勅王毋撓有司以靖亂源銷意外變宸
濠聞大怒列世寧罪徧賂權倖必殺世寧命錦衣官
逮捕時世寧已遷福建按察使取道還里聞命自投
錦衣獄獄中三上書言宸濠逆狀繫歲餘謫戍瀋陽
居四年宸濠果反世寧起戍中為湖廣按察使擢巡
撫四川歷官太子太保兵部尚書卒謚端敏

白志

范輅字以載桂陽人正德進士清軍江西宸濠寵伶人秦榮僭擬如王居輅劾治之又極論鎮守太監畢真罪宸濠令諸司以朝服見輅不可抗章下廷議如輅言濠乃怨輅撫他事誣之遂逮下詔獄未幾宸濠反世宗初復故官遷福建僉事仍轉江西副使致仕歸同上

孫燧字德成餘姚人弘治進士正德十年十月以副都御史巡撫江西時寧王宸濠有逆謀燧聞命歎曰是

投我艱也乃遣妻子還鄉止攜二童入南昌南昌人
洶洶謂宸濠旦暮且得天子諸黨附及羣盜相倚聲
勢燧左右亦多為耳目刺燧言動輒馳告燧防察甚
密知副使許逵忠勇可屬大事多與謀又懲胡世寧
事未敢訟言於朝托禦他寇曲為備先城進賢次城
南康瑞州惠建昌縣多盜割其地別置安義縣以漸
弭之而請復饒撫二州兵備九江當湖衝最要害請
重兵備道權以便控制廣信橫峰青山諸窰地險人

悍則請設通判駐弋陽又恐宸濠劫兵器假討賊盡
出之他所十三年江西大水宸濠素所蓄賊凌十一
等出沒鄱陽湖燧與逵捕之賊去匿宸濠林墓間於
是密疏白宸濠必反章七上輒為宸濠遮獲不得達
燧日益憂懼髭髮盡白明年會御史蕭淮盡發宸濠
不軌狀詔重臣宣諭濠聞決計反六月乙亥宸濠生
日宴鎮巡三司明日燧及諸大吏入謝宸濠伏兵左
右大言曰太后有詔令我起兵衆相顧愕眙燧直前

曰安得此言果有詔請出示之宸濠曰無多言我往
南京汝當扈駕燧曰汝速死耶天無二日吾豈從汝
為逆哉宸濠怒叱燧麾兵縛之諸司股栗獨逵曰汝
曹安得辱天子大臣因以身翼蔽燧遂并縛逵二人
且縛且罵不絕口擊燧折左臂與逵同曳出遇害惠
民門外燧生有異質遇事挺然不撓兩目爍爍夜有
光死之日天忽陰慘烈風驟起凡數日民大恐走
兩人屍蠅蚋無近者贈禮部尚書謚忠烈與逵並祀

南昌賜額旌忠錄一子世襲錦衣千戶

同上

許達字汝登固始人正德進士長身巨口猿臂燕頤沉
靜有謀略以靖寇功超擢山東兵備僉事遷江西副
使時宸濠暴橫甚達每繫其黨繩以法嘗言於孫燧
曰寧王敢為暴者恃權臣也權臣左右之者貪重賄
也重賄由於盜數今惟翦盜則賄息賄息則交解交
解則黨孤燧然其言每事與密議及宸濠反縛燧達
爭之宸濠素忌達問許副使何言達曰副使惟赤心

耳肯從汝反乎濠怒曰我不能殺汝耶達罵曰汝能殺我天子能殺汝遂并縛達曳出斫其頸屹不動賊衆共推抑令跪卒不可得遂死年三十六世宗即位贈左副都御史謚忠節蔭一子錦衣千戶

同上

黃宏字德裕鄞人弘治進士知萬安縣民好訟訟輒禱於神宏毀其祠曰令在何禱也訟者至輒片言折之調泰和遷戶部主事歷江西左叅議按湖西嶺北二道王守仁討橫水桶岡賊宏主餉以功加俸一等賊

閔念四既降復恃宸濠勢剽九江宏發兵捕之走匿
宸濠祖墓中盡得其輜重以歸宸濠逆跡益露士大
夫以為憂宏正色曰國家不幸有此吾輩守土惟死
而已民有持大義不從宸濠黨者宏每陰左右之及
反被執宏憤怒以手梏向柱感項是夕卒賊義而殮
之子紹文奔赴求得其棺以偽命治殮非父志亟易
之扶歸世宗立贈宏太常少卿祀旌忠祠又馬思聰
字懋聞莆田人弘治進士以南京戶部主事督糧江

西駐安仁值宸濠生日或勸勿往思聰曰吾欲覘之疾報天子耳被執繫獄不屈絕食六日死世宗立贈光祿少卿祀旌忠祠

同上

按豫章書云旌忠祠祀孫許二公南禮科給事中王子謨復以馬主事黃叅議死節事聞有旨贈官配享御史鄧顯麒題黃馬不當與孫許同祠有旨以副使周憲配享撤黃馬祀嗟乎謂黃馬二公之死不如孫許之烈則可然比之王綸潘鵬則薰蕕

矣傳曰以死勤事則祀之死猶不祀亦何責之苛

耶

原跋

王守仁字伯安餘姚人弱冠舉鄉試好言兵登弘治進士正德元年劉瑾建言官戴銑等守仁抗章救瑾怒矯旨廷杖謫龍場驛丞瑾誅累官鴻臚卿十一年兵部尚書王瓊奇其才遂擢右僉都御史巡撫南贛時南中盜賊蜂起謝志珊據橫水左溪桶岡池仲容據泃頭皆稱王攻剽府縣而福建大帽山賊又起前巡

撫文森託疾去贛縣主簿吳玘戰死守仁至知左右
皆賊耳目乃呼老黠吏詰之貫其罪令誦賊賊動靜
無弗知於是檄閩廣會兵先討大帽賊親率銳卒屯
上杭佯退師出不意搃之連破四十餘寨俘斬七千
有奇九月進兵大庾討橫水左溪守仁自駐南康去
橫水三十里先遣四百人伏賊巢左右進軍逼之賊
方迎戰兩山舉幟賊皆驚潰走桶岡督諸將破之乃
設崇義縣於橫水還至贛州議討剎頭賊以計悉擒

戮之乃於下泚立平和縣置戍而歸十四年六月奉
命勘福建叛軍行至豐城而宸濠反急趨吉安與伍
文定徵調兵食傳檄勤王因集衆議攻水陸並進七
月壬辰朔宸濠襲下九江南康出大江薄安慶或請
救安慶守仁曰不然我越南昌與相持江上是腹背
受敵也不如直搗南昌賊聞南昌破必解圍自救逆
擊之湖中蔑不勝矣以伍文定為前鋒抵廣潤門守
兵駭散入城安士民慰諭宗室居二日宸濠果自安

慶還兵知府伍文定當其前鋒知府邢珣繞出賊背
賊大潰退保八字腦明日復戰以小舟載薪乘風縱
火焚其副舟婁妃以下皆赴水死宸濠易舟逃萬安
令王冕率所部兵追執之從逆諸臣皆獲遣兵下九
江南康凡三十五日而賊平京師聞變諸大臣震懼
王瓊大言曰王伯安居南昌上游必擒賊至是果奏
捷時帝已親征自稱威武大將軍命安邊伯許泰太
監張忠抵南昌而守仁先俘宸濠發南昌至錢塘遇

太監張永以俘屬之而身至京口欲朝行在聞巡撫
江西命乃還南昌忠泰已先至恨失宸濠縱卒嫚罵
守仁厚撫慰之卒皆悅遂班師去世宗即位特進光
祿大夫封新建伯總督兩廣疏乞骸骨行至南安卒
年五十七喪過江西軍民無不縞素哭送者隆慶初
廷臣多頌其功詔贈新建侯謚文成

同上

伍文定字時泰松滋人弘治進士有膂力善弓馬授常
州推官以勦魏國公訟田事忤劉瑾斥為民瑾敗起

嘉興同知擢吉安知府討平永豐及太茅山賊佐王
守仁平桶岡橫水宸濠反王守仁至豐城聞變文定
急以卒三百迺於峽江協謀討賊賊平功最擢江西
按察使張忠許泰至南昌欲冒其功而守仁已俘宸
濠赴浙江忠等失望大恨文定出謁遂縛之文定罵
曰吾不惜九族為國家平大賊何罪汝屈辱忠義為
逆賊報讐法當斬忠益怒推文定仆地文定求解任
不報遷廣東右布政使世宗嗣位文定列上忠等罪

狀又請發宸濠資財還之江西以資經費矜釋忠泰
所陷無辜及寧府宗人不預謀者以清冤獄帝嘉納
之進右副都御史提督操江仕至兵部尚書卒於家
天啟初追謚忠襄

同上

周廣字克之崑山人弘治進士歷知莆田吉水二縣正
德中以治最徵授御史即疏陳四事糾錢寧不法狀
寧怒謫懷遠驛丞稍遷建昌知縣有惠政部擬除憲
職寧矯旨再謫驛丞世宗即位復故官歷江西副使

提督學校舉治行卓異擢福建按察使六年以右僉都御史巡撫江西廣為人嚴冷無笑容弗受請託士類莫不憚之

同上

鄭岳字汝華莆田人弘治進士累官江西按察使尋陞左布政宸濠奪民田億萬計民立砦自保濠欲兵之岳持不可濠怒遂以事奪職發戍及濠叛起江西巡撫時多坐助逆者岳曰濠橫恣甚我藩司且被挫折况民乎分豁千餘家尋遷兵部右侍郎乞休去

白志

劉璽字廷守龍驤衛人正德間任江西都司巡撫盛應期知其廉明每屬以疑獄多所平反巡按穆相薦總漕運璽奏三十餘疏垂為漕政良規尋以直忤當道

罷歸

江南通志

唐龍字虞佐蘭溪人正德進士除郟城縣徵授御史疏斥錢寧再按江西時宸濠已擒疏趣張忠許泰班師三司官從宸濠叛者猶居位龍召數之曰脅從罔治謂凡民耳若輩讀書食祿何覲顏乃爾立收其印歷

官總督三邊軍務太子太保吏部尚書卒謚文襄

白志

按明一統志龍按江西疏請班師如解倒懸列從
逆之罪表劉源清馬津之功劾鎮監崔和之黷貨
辨雪脅從先後所上九十餘疏無非為民請蠲賑
患時賴以寧去後肖像同仁祠

原跋

潘希曾字仲魯金華人弘治進士嘉靖四年以右僉都
御史巡撫南贛討平惠州賊賴貴斬泃頭賊曾蛇仔
遷工部右侍郎

同上

顏珀字載祥晉江人弘治進士累官江西左政使雅志恬澹會詔有太乙觀之役不忍加派於民因覈司藏見二巨桶封識凝塵啟視之約數千金亡其籍矣遂報撫按抵公費民頌其德

安志

按珀止一事而安志所載太乙觀之役年月亦失考

顧應祥字惟賢長興人弘治進士授饒州推官桃源寇亂掠樂平令以去應祥單身入賊壘出令賊亦解去

入為錦衣衛經歷累官江西副使分巡南昌值宸濠
亂定撫循瘡痍招集流亡皆善後事宜仕至刑部尚
書致仕

明儒學案

陶諧字世和會稽人弘治進士嘉靖元年除江西僉事
久之提督南贛汀漳軍務疏奏天下差徭煩重乞罷
免里甲供億諸費帝采納之尋遷兵部右侍郎

白志

盛應期字思徵吳江人弘治進士嘉靖二年巡撫江西
宸濠亂後瘡痍未復奏免雜調緡錢數十萬請留轉

輸南京米四十七萬銀二十萬以業饑民又令諸府積穀備荒尋進兵部左侍郎總督兩廣

同上

林庭棻字利瞻閩縣人弘治進士授兵部主事歷仕江西叅政舉治行卓異歷湖廣左右布政擢右副都御史巡撫保定仕終工部尚書卒謚康懿

同上

按陳洪謨江西通志序云江西舊無通志嘉靖癸未秋御史中丞東吳盛公屬大叅林君庭棻憲副周君廣為之書凡二十冊又稱其博古能文發凡

立例得諸專經世學為多則江西之有通志自庭
棉始功不可沒而安志并去庭棉名特表出之

原跋

查約字源博海寧人弘治進士嘉靖二年任江西副使
多惠政冰蘖自勵治行為一時最官至山東巡撫

白志

邵銳字思抑仁和人正德戊辰會元歷官江西提學僉
事抑浮崇實恥於近名不立門戶改福建提學仕終
右副都御史謚康僖

南昌府志

徐一鳴字伯和醴陵人正德進士由吏部驗封郎中陞

江西提學副使崇正學正文體創東湖書院毀淫祠
為鎮守中官所憾劾以抄毀寺觀竟落職去士論惜
之同上

余珊字德輝桐城人正德進士世宗立擢江西僉事討
平梅花洞賊仕至四川按察使珊律已清嚴居官有

威惠

白志

張岳字惟喬惠安人正德進士官行人諫南巡杖謫南
京學正嘉靖初復官尋以右副都御史巡撫江西貴

溪相治生塚廣信七縣議各措千金岳曰豈範金為
槩乎縣百金足矣分宜相奉賜建延恩閣岳批牘與
千金所司請益不許乙巳大饑設法措賑奏留京折
銀五萬兩又請折正兌米數十萬石以故饑而不害
卒贈少保謚襄惠

福建通志

周用字行之吳江人弘治進士正德中擢給事中以請
治鎮守江西中官黎安罪時多其直出為廣東叅議
嘉靖八年擢右副都御史巡撫南贛以廉潔著仕至

吏部尚書卒贈太保謚恭肅

白志

按徐文貞階撰墓誌銘稱用督南贛軍務時有巨盜橫行捕久不獲用廉其黨有悔悟者召至諭以利害因以賞誘之遂奉成筭俘斬以獻并移檄各屬薄賦平徭緩徵軍餉以塞盜源行之期年盜不復作初橋厰權商稅太重商皆避而他趨餉不給用調其輕重著為例商復趨之贛豪室多隱其田額以虛稅竄貧戶用命履畝丈額盡革其私賦沒

以均又按豫章書嘉靖己丑都御史周用以吉安撫州二府屬縣萬安龍泉泰和永豐永寧樂安接壤詞訟繁連異府人民難以勾攝建議增轄以便

統屬

原跋

唐胄字平侯瓊山人弘治進士嘉靖癸巳以右副都御史提督南贛贛墉堞庫小胄增築樓櫓又疏請置湖西道檄守巡分駐臨江吉安令緩急可恃半年改撫山東歷仕戶部左侍郎

分省人物考

徐階字子升華亭人嘉靖二年第三人及第官江西按察副使視學政正文體端士習創王文成祠及同仁祠累官吏部尚書大學士卒謚文貞

白志

胡松字汝茂滁州人嘉靖進士官江西左布政使晉右副都御史巡撫江西所部多盜奏設南昌南豐萬安三營遣將討捕以次削平進兵部右侍郎巡撫如故以會討廣東巨寇張璉賜銀幣松潔已好修富經術鬱然有聲望累官吏部尚書卒贈少保謚恭肅

同上

按豫章書廣闡賊犯撫州及鉛山松提兵直抵信
州去賊百里議者謂賊勢銳宜觀變松曰不然古
人以雪夜俘賊擊不意也予新任賊不虞猝至即
往臨之立驚潰矣一晝夜竟達撫州諸路並進擊
賊大敗江西以寧此嘉靖辛酉年事也明年壬戌
張璉作亂松陳四事上之曰增置府縣精選守令
互相策應亟議招徠報可

原跋

魏一恭字道莊莆田人嘉靖進士授温州推官歷官江

西左叅政分守南昌道孤介剛方人莫敢犯平生絕不苟取雖交際微物亦峻却嘗自言不要官不要錢不要命則何事不可為人目之為三不要遷廣西左

布政使

安志

馬森字孔養懷安人嘉靖進士授戶部主事權九江關以廉能著歷太平知府再遷江西按察使有進士嬖外婦而殺妻撫按欲緩其獄森卒抵之法歷左布政就擢巡撫江西森久歷江西多惠政入為刑部右侍

郎白志

譚太初字宗元始興人嘉靖進士授工部主事歷官江西副使清軍多所釋御史以失額為疑太初曰失額罪小殃民罪大嚴嵩親黨奪民田按治之不少貸遷廣西右叅政歷官南京戶部尚書卒謚莊懿同上

丁應璧字為章壽光人嘉靖進士由南京兵部郎中陞南昌知府歷江西按察副使天性廉介政簡易有體不屑屑與僚屬競敝衣蔬食以風吏民王孫有以金

魚貯盆餉之者烹啖以愧之其素尚如此隆慶間舉

卓異晉山西叅政

豫章書

周如斗字允文餘姚人嘉靖進士授貴溪縣擢御史歷
官巡撫江西如斗稔知民困差徭勅議行條鞭法以
勞瘁卒疾革時對諸司語不及他惟刺刺談條鞭本
末士民巷哭肖像祀之

安志

萬士和字思節宜興人嘉靖進士改庶吉士授禮部主
事累遷江西僉事歲裁上供磁器以千計民便之歷

官至南京禮部尚書卒謚文恭

白志

王宗沐字新甫臨海人嘉靖進士授刑部主事歷江西提學副使修白鹿洞書院引諸生講習其中陞按察使歷右布政使作江西大志曰賦書均書藩書漑書實書險書陶書至今奉以為規歷官至刑部左侍郎

同上

虞守愚字惟明義烏人嘉靖進士以僉都御史提督南贛築黃鄉城遷羊角水堡復長沙營勦程鄉大埔等

處流賊及修復書院增立社學免役賑荒仕終南京

刑部侍郎

贛州府志

朱紉字子純長洲人正德進士嘉靖二十五年以都御史撫贛上言去外盜易去中國盜難去中國羣盜易去中國衣冠盜難廉得濱海奸人及貴臣為之中庇者具以狀聞督閩將盧鏜出海斬獲甚夥兵勢大振屢著奇績而為憾家所劾罷歸士論惜之

分省人物考

吳百朋字惟錫義烏人嘉靖進士巡撫南贛討平河源

賊李亞元程鄉賊葉丹樓兵威大振先是下歷高砂
岑岡號三巢荼毒信豐龍南安遠地方而下歷酋賴
清規尤桀黠百朋籌畫兵食選練將卒誓必滅賊果
擒清規於苦竹嶂羣賊震懾改設定南縣境內以寧
歷官至刑部尚書卒

列卿錄

鄭世威字仲孚長樂人嘉靖進士官江西僉事大學士
夏言里居巡撫為設醮壇祈嗣世威獨不往嘗謁言
閤人令從角門入世威曰趣還我刺言為啟中門乃

入尋轉江西副使會嚴嵩柄國其族黨有犯者世威抵以重法遷四川叅政念嵩終害已致仕歸嵩敗中外交薦官至吏部右侍郎卒謚恭介

同上

栗永祿字仕學長治人嘉靖進士任江西按察使風采峻厲時籍分宜之家當事者承望風旨株及平民以盈其數永祿憐之審釋者千計屬邑積蠹悉捕治之累官兵部右侍郎

安志

秦鈞字鳴和慈谿人嘉靖進士任江西左布政政治嚴

明金錢出入委之屬官羨餘悉貯為公帑官舍中僅
家僮一二偶感時事輒引去行李蕭然

同上

談愷字守教無錫人嘉靖進士先以戶部員外郎監兌
江西大展清譽後以右副都御史巡撫南贛諭降贛
賊李文彪旋以其衆征海寇盡殲之賜白金文綺進

兵右侍郎

分省人物考

汪一中字正叔歙人嘉靖進士由開封推官屢遷江西
副使鄰境賊入寇薄泰和當路以討賊屬之先是泰

和巡檢劉芳力戰死一中至率諸將吏祭之曰爾職
抱關猶死疆事吾待罪方面不滅賊何以生為遂誓
師列陣賊至左右軍皆潰一中躍馬當賊鋒與指揮
王應鵬千戶唐鼎皆死之事聞贈光祿卿謚忠愍妻
程氏不食五日死

白志

汪尚寧字廷德歙縣人嘉靖進士以副都御史巡撫南
贛為祠祀瀛溪陽明聚士講學其中既平贛賊頗有
功以執政嘆之罷歸

贛州府志

王鈞字子宣會稽人嘉靖進士以右副都御史提督南
贛軍務所轄多峒賊鈞至則解諸繁令惟使郡縣恤
孤寡撫流移不煩兵而底定轉兵部右侍郎

同上

陸穩字汝成歸安人嘉靖進士歷官江西左布政使嘉
靖辛酉閩廣寇起流劫江西其渠張璉甚而僭號改
元陞穩副都御史巡撫南贛詔四省會征兵分七哨
穩授計叅帥俞大猷生得璉於漳州穩號令嚴整懸
賞購賊千金無所惜故贛兵所向輒克

同上

魏謙吉嘉靖間巡按江西才猷軒敏綽有風裁墨吏豪猾莫不悚息時歲大饑出贖鍰為糴民賴全活復奏蠲全稅威惠懋著

明一統志

黃卿歷江西叅政左右布政使清介峻特大旱步禱經旬不少懈遇解兌原封出入堂無筦庫捐修學舍及城隍廟入覲唯圖書數卷有清風兩袖獨朝天之謠

同上

俞大猷字志輔晉江人舉嘉靖武會試除千戶累以平

賊功代劉遠為浙江總兵官廣東饒平賊張璉攻陷城邑數年不能平詔移大猷南贛合閩廣兵討之時胡宗憲無制江西檄大猷急擊大猷謂宜以潛師搗其巢攻其必救奈何以數萬衆從一夫浪走哉乃疾引萬五千人登柏山高領俯瞰賊巢璉果還救大猷連破之斬首千二百級執璉并賊首蕭雪峰散餘黨二萬不戮一人擢副總兵協守南贛汀漳惠潮諸郡遂乘勝征程鄉盜平之擢福建總兵官徙鎮南贛大

猷為將廉馭下有恩數建大功威名鎮南服用兵先計後戰所在有大勲卒贈左都督謚武襄

白志

按贛郡志云陸穩授計俞大猷與此不合

張紳字子儀柳州人嘉靖進士授刑部主事抗疏劾嚴嵩父子亂政詔獄謫戍穆宗嗣位召為吏部主事二年以右僉都御史巡撫南贛劇盜黃朝祖流劫諸縣紳討禽之移撫湖廣

同上

劉光濟字憲謙江陰人嘉靖進士隆慶初以右副都御

史巡撫江西先是巡撫周如斗議立條鞭法未就光
濟至銳意奏行定為四差民輸金於官官為催役輕
重適均徭役之困永絕又創坊甲條鞭如里甲法人
享其利歷官至南京吏部尚書

安志

陳有年字登之餘姚人嘉靖進士萬歷間以右僉都御
史巡撫江西屢疏乞免燒造鮮紅瓷器并繁臺龍缸
諸異巧竟得俞旨戊子水災特疏請蠲賑豁南昌魚
課人德之南昌衛軍餘丁差每苦虐奏請行條鞭法

徵銀催募如州縣積困始甦旋以浮言罷歸後官至

吏部尚書卒謚恭介

豫章書

陸萬垓字無畦平湖人隆慶進士累官以右僉都御史
巡撫江西行社倉法貯穀千萬石歲侵發賑全活甚
多濱江圩壞輒令有司築之居官寬易不苛而汲汲
民事至忘寢食竟以勞瘁卒官民為立祠江上

安志

沈越字中甫江寧人嘉靖進士巡按江西執法峻整嚴
嵩當國意有所不悅以指授越越不從嵩銜之坐甲

辰監試被議左遷開州判

江南通志

鄭述字世美閩縣人嘉靖庚戌進士仕至江西參議祖琳居官剛介人目為鄭硬頭述有祖風亦不能俯仰於人時相嚴嵩奪民溉田湖塘來訴者幾千人述命各荷鍤以從頃刻開掘以還於民嵩怒甚人皆危之未幾嵩敗述得無恙

福建通志

李天植字性甫廣德人嘉靖進士任饒南道參議時毀天下書院當事者希執政意欲併廢白鹿洞膳田植

持不可且捐俸增益諸生廩餼俾時講習其中後歷

曹濮兵備以終

江南通志

高鏞字京甫內江人初以平陽令徵拜御史巡按江右時分宜柄政鏞行部不修私覲既至即逮其家不法者無少徇竟以此落職外補稍復起擢南京部郎鏞竟歸篋無長物庭鮮干謁獨事闕鄉閭利害者則侃侃言之里人皆受其福

四川通志

林潤字若雨莆田人嘉靖丙辰進士先知臨川以治行

最擢御史巡按江西嚴世蕃置酒為別諸御史座上不敢吐一語潤獨高談不顧既罷世蕃遣人候之曰嚴侍郎致謝願無刺當世事潤至即首論嚴嵩最幸門士副都御史鄔懋卿罪復疏世蕃羅文龍大逆狀御史鄒應龍亦以為言二人並謫戍及世蕃敗潤起按視上江又具疏發其奸狀乃誅世蕃籍其家擢潤都御史巡撫蘇松卒於官

福建通志

潘季馴字時良烏程人嘉靖進士授九江推官擢御史

萬歷四年巡撫江西念德化桑落洲堤崩田荒發廩捐資築之凡七十餘里視封郭三倍有奇五閱月告成今為沃壤江人至今德之

九江府志

李一瀚字源甫仙居人嘉靖進士歷御史陞江西按察僉事平衡鹽政復武陽郡公廟祀疏超溪水利歷左

副都御史

南昌府志

馮岳字望之慈谿人嘉靖進士任江西左布政使錢糧不任庫官郡邑來謁者輒屬之筦視出入吏胥弊絕

藩政肅清累官南京刑部尚書

同上

劉思問字汝知孟縣人嘉靖進士萬厯初以僉都御史
撫南贛承湖粵寇平之後刻意振刷選士子集陽明
書院廩餼而考校之文風大振厯官至南京戶部尚
書

贛州府志

陶承學號方塘會稽人嘉靖進士視兵九江適贛賊流
劫臨吉戕副使汪一中破玉山縣江右倣擾承學大
治兵湖口防其突逸適議事安慶還至黃石磯與賊

帥袁三遇遂麾舟師鼓而薄之舟繚斷帆解勢將逼
陶師射賊亦斷繚遂盡殲之

安志

按九江府志載承學陞湖廣叅政以去守巡道於
常俸外制有廩給承學第取蔬肉九江臨發時積
贏至數百金承學拒不肯受請者曰此法當受也
承學曰郡城惡矣曷繕諸及工竣郡人為碑紀其
事歷官刑部尚書子望齡即石簣宗伯實生於九

江署中

夏良心字宗堯廣德人隆慶進士授刑部主事累陞江
西左布政使精覈吏事下牒若流水州縣轉賦一至
即輸尋擢巡撫江西積穀貯義倉荒政賴之稅使至
良心力與爭減權額又奏停采廣信封禁山及景德
鎮窯器但用土青俱得請卒於官贈兵部尚書賜特
祠曰褒德

南昌府志

朱鴻謨字文甫益都人隆慶進士授吉安推官識鄒元
標於諸生厚禮之擢南京御史以疏救言官語侵居

正居正怒斥為民居正卒起官出按江西奏蠲水災
賦請減饒州磁器不報又疏薦建言削籍者忤旨奪
俸歷官刑部右侍郎贈刑部尚書謚恭介

白志

按豫章書鴻謨署篆泰和去住市米自給嚴屏里
甲常供片脯升醪捲握之饋不得至前裋身清潔
一有俸羨傾賑貧儒所入援手而盡嘗曰吾身旁
貯銀倘至五銖輒病其大廉不嘽殆天授然也

謝杰字漢甫長樂人除行人冊封琉球累遷順天府尹

以右副都御史巡撫南贛屬吏被薦者多賄杰曰賄而後薦干戈之盜薦而後賄衣冠之盜人以為名言進南京刑部侍郎尋擢戶部尚書

同上

按贛州府志杰雅負經濟於戎務民事虛懷博訪立營柵稽權稅革計吏減和糴平反冤獄禽制積寇地方翕然稱快又建玉虹塔於下河雙江皆美政也

李佑字吉甫貴州清平衛人嘉靖進士歷官江西副使

程鄉賊敗奔瑞金佑邀擊之三戰皆捷又敗廣東賊
吳志高下歷賊賴清規賜銀幣進江西右叅政偕總
兵官俞大猷大破劇賊李亞元擢僉都御史巡撫廣

東

同上

王佐字泰蒙鄞縣人萬歷進士任南昌府陞按察使晉
布政使巡撫江西凡在豫章二十餘年深仁厚澤士
民為之立祠

安志

張岳字汝宗浙江餘姚人嘉靖進士授行人擢禮科歷

操江疏論張居正奪情事居正怒落職閒住居正死起岳右僉都御史巡撫南贛岳鑒前政苛擾務為簡靜汰冗食省浮費百姓愛之入為刑部右侍郎

白志

江以東字貞白全椒人隆慶進士由南京考功郎中陞江西提學副使操持方正人不敢干以私校士至南贛當路者撓之竟拂衣歸

南昌府志

陸長庚字元白號津陽平湖人萬曆進士累官湖南道三十年進江西右布政使轉左時宗祿不給宗屬千

餘人譟於衢兩臺束手長庚出存積銀十三萬補之
三十六年大水請弛長河魚禁以卹饑民建唐韋丹
崇祠為文記之重建攬秀樓湯顯祖為之賦在任七
年羨餘悉封簿貯庫擢順天府尹士民為立祠章江
門內西大街終南京兵部右侍郎

檢討李澄中撰傳

江一麟字仲文婺源人嘉靖進士萬厯間以副都御史
巡撫南贛豁達大度喜怒不形與贛守葉夢熊守道
張士佩巡道朱如密筭進兵平安遠黃鄉賊搗其巢

穴渠魁授首陞總督漕運都御史至今贛民立祠祀之
贛州府志

賈待問字叔學東萊人隆慶進士萬曆甲申以右僉都御史巡撫南贛鎮遏有方盜不入境疏通鹽法俾吉民受筭於廣公私交便晉階太子太保

同上

容若玉號崑石懷寧人萬曆甲戌進士歷陞嶺北道履任即值岑賊嘯聚廣中平和諸境玉兼攝布政司事假節鉞鎮之兼程進發乘其不意出兵於大龍保要

害因檄嶺北兵截其歸路遣諜者火其巢賊失據一
戰縛之人皆服其雄略

江南通志

張恒字明初嘉定人萬歷進士由刑部郎遷江西副使
凡訟獄片言立決時相國以湖利與小民競恒奪以
與民舉江右循吏第一

同上

陳一元字泰始侯官人萬歷辛丑進士令四會南海嘉
定俱著政聲擢御史巡按江右值歲祲民饑奏留本
年稅銀發賑檄所司告糴吳楚轉輸于民全活無算

因為時宰所嫉螫以他事時神宗疏多留中一元不

俟命即拂衣歸

福建通志

方大美字黃中桐城人萬厯丙戌進士御史巡按江西
抗稅璫飭吏治尤好士故事校士皆屬學使者大美
獨以拔孤寒羅英俊為已任所培植甚盛

江南通志

龔道立字應身武進人萬厯進士由兵部郎知建寧府
歷江西嶺北道叅政粵東歲祲有數千人度嶺來邏
者以寇報撫軍倉皇議兵道立曰此必饑民就食耳

請身往諭設法賑濟士民德之道立每以經術飾吏
治在吉安葺白鷺洲書院與王塘南鄒南臯講學其
中尋陞湖廣按察使致仕年七十三卒建寧思舊德
立祠水西街祀之本籍亦崇祀鄉賢著有仕學堂四
書說約白鷺洲書院問荅陶白齋詩文稿考槃錄等

書

常州府志

王敬民字用司西華人隆慶進士萬厯間以僉都御史
莅虔飭兵防興文教鋤積猾因郡城多災備救火具

開七星井於南街栽萬松於水東庚寅大疫選醫開局全活甚多贛民思之

贛州府志

李汝華字茂夫睢州人萬歷進士以僉都御史撫贛持守方嚴威令信肅稅監入虔欲坐兩權闕筦其鑰汝華力與爭止許割額稅之半稅使恚甚相持數日竟如初議建贛寧二學修王文成祠詳纂輿圖要覽在鎮凡十四年所操如一日以太子太保致仕

同上

吳達可字安節宜興人萬歷進士歷知會稽上高豐城

並有聲選授御史歲侵繪上饑民十四圖力請賑貸
出按江西稅使潘相毆折輔國將軍謀圮肢并繫宗
人宗達誣以劫庫劾上饒知縣李鴻主使帝切責謀
圮等奪鴻官達可言宗人無故受刑又重以詰責將
使天潢人人自危鴻無辜不當黜願亟正相罪復鴻
官相又請開廣信銅塘山采大木鑿泰和武姥山石
膏達可復極諫不可閣臣力爭之乃寢累官南京通

政使

白志

查允元字虞臯海寧人萬厯進士歷禮部郎中出為江西提學僉事再任江西叅政持守廉介莅事六載終始不移衡文不爽毫髮所拔士皆登上第歷通顯遜國忠臣練子寧八世孫練綺自福建長樂回原籍公訪得之留綺家峽且給衣巾復給學租百石令奉祀金川書院性恬退年未五十以疾乞休

練公遺事

黃承元字履常秀水人萬厯進士官湖西叅政間歲遷粵西觀察湖西父老籲留之乃復以觀察治湖西以

卹民隱寬民力為首務其時潘璫以督憲至與陳璫
比承元移書禁止土青累千百言璫斂容遜謝事竟
寢永新萬安諸材官夤緣作奸縻屯精為漕累或貸
富人錢虛募營卒以應承元悉加釐革袁屯益漕自
出官鏹為營規三載晉中州右轄累官福建巡撫贈
工部右侍郎

吉安府志

李長庚字孟白湖廣人萬厯進士任江西布政除解費
察吏弊清介絕俗惟重士尊儒屬郡操觚者皆願列

其門士民愛之立祠滕王閣之右

安志

錢櫨字岳陽會稽人由進士以文章名萬厯間知袁州府豈弟廉易尋以憂去後提督江西學政以公明稱行部袁州建袁高士祠自為記以風厲諸生至今誦學政者必首稱之

同上

葛寅亮錢塘人萬厯進士壬子兵備九江銳意興除先是湖口稅璫李道勢熾猖獗當道莫敢問寅亮至即榜張其弊蠹仍條闕款檄道舉行移檄湖口守備約

於五月某日巡歷湖江令守備練兵以候道莫知所
為門常晝扃寅亮因執其舖戶某等立斃以法漸及
叅隨胥吏道望門請託寅亮曰該監人役俱我百姓
敢於骫法病商皆得執而問之於是除冗役首惡論
罪分謹守者百餘人為二番給牌腰佩之月赴道驗
更聽約束民始免水火矣癸丑饑出三府公費數百
金并貸闕使者千金遣官告糴湖襄以平價糴民賴
以活創建陽明書院置膳田選諸生肄業其中置社

學十二所以教貧民子弟之不能延師者開南熏東
作二門置月城湖中築堤建橋設西城閘蓄水以制
火患濬老鶴塘建置如不及既而移疾去行李一肩
而已

同上

舒其志廣濟人萬厯進士累官江西按察使攝饒州兼
署九江淮王有世子十三齡王惑于寵娼欲以其子
易之左右班校皆巨盜出沒彭蠡間白晝攫人金其
志廉其情佯託卧閣絕請謁止留干掇四人司局鑰

羣不逞皆舉酒相賀忽夜半出袖中紙署賊名令前
四人者分捕其黨而置之法遂謁王王色沮出世子
於宮中而殺其偽子及娼湖口璫李道司稅除廠校
緝事外自置京隨百餘人皆悍賊死黨上下羅織即
蓮舟漁艇無得脫者其志製飛鷁數隻由鄱湖度湖
口密令守戍丙夜聚蘆葦列炬火喊聲山震令人從
烈燄中縛其渠魁用前艇飛送九江獄校衆奔跳水
中璫聞之竟泥首乞命其志故為之計曰若住此吾

知不免惟束裝宵遁耳璫果遁去於是凡助璫為虐者盡置之法人咸快之

同上

李開芳永春人萬歷進士任江西按察使時中使入豫章咆哮礦稅首及廣信其爪牙橫甚大吏莫敢誰何上饒知縣李鴻獨捕數人杖斃之中使怒露章疾馳撫臣某慮波及將繼劾開芳曰果爾海內視公為何如人請劾某而置上饒撫臣慚而退開芳禮賢恤士工文藻精八分書西江諸名勝往往有其題額

南昌

府志

丁繼嗣字國雲鄞縣人萬厯進士厯官江西副使分巡湖西陞叅政分守南贛精於吏事敏決無所留滯城垣解字庫陋傾圯者亟為修飾贛縣學更重新之累官副都御史

贛州府志

陸夢龍字君啟會稽人萬厯進士授刑部主事時張差獄起承問官鮮不為鄭氏地者夢龍獨力持之歷江西叅議上官建魏忠賢祠列夢龍名亟遣使剷去之

後以右叅政分守固原流賊至力戰死之贈太僕卿
白志

按九江府志夢龍夙有時名善談文章進諸生講
藝陽明書院士風翕然天啟癸亥甲子之際承平
日久人不知兵夢龍召募健兒五百教之技擊號
稱標兵九江之有標兵自夢龍始也

洪瞻祖字貽孫錢唐人萬歷進士巡撫南贛閩廣流寇
騷擾瞻祖檄諸郡合勦親歷蠻瘴犯矢石不數月平

卷五十八
賊渠了婆總等奪還男婦器械牛馬無筭增築亭堡
以疾乞歸囊橐蕭然有撫虔奏疏一卷

贛州府志

黃汝亨字貞父仁和人萬歷進士授進賢縣清賦簡訟
教士卹郵修堤橋建社學民甚德之由郎中出為江
西提學衡文一以先民為法如臨川陳際泰東鄉艾
南英皆其首錄士不受請託陞分巡湖西叅議卒以
強項罷歸所著有寓林集

安志

蔡懋德字惟立崑山人萬歷進士官江西提學副使頒

王守仁拔本塞源論於諸生自著管見臆說數千言
發明良知之學士多興起累官至山西巡撫闖賊攻
城力戰死之謚忠襄

白志

李成名字寰知太原衛人萬厯進士以右僉都御史巡
撫南贛魏忠賢以成名為趙南星所用因所屬給由
犯御諱除其名為巡撫止八月士民祠祀之

同上

吳麟瑞號秋浦海鹽人萬厯進士為湖東巡道初下車
謁羅明德遂於明德祠講學諸生講論有佳者必拜

手受之崇禎癸酉龜峰渡風濤驟至溺死者三十餘人麟瑞惻然捐建橋梁顏曰萬年與太平橋相望焉

安志

按明詩綜麟瑞由吏部郎歷江西副使按察使右布政使有哀鴻蟋蟀諸集

解學龍字石帆興化人萬歷進士崇禎五年以右僉都御史巡撫江西疏言臣所部州縣七十人而坐逋賦降罰者至九十人由數歲之逋責於一歲數人之逋

責於一人故終無及額之日請別新舊酌多寡立帶
徵之法可之四方盜賊蠭起江西獨無重兵學龍以
為言詔增置千人都昌萍鄉盜發討平之封山妖賊
張普薇等擁衆橫行合閩兵剿滅十二年冬擢南京
兵部右侍郎

白志

林日瑞字洛元詔安人萬歷進士歷官江西右叅政憂
歸服闋起故官分守湖東屬縣鉛山界閩妖人聚山
中謀不軌圍鉛山日瑞擊敗之搗其巢累官右僉都

御史巡撫甘肅流賊薄甘州死之

同上

胡士相字端甫平湖人萬歷進士授弋陽縣弋故多盜
士相嚴保甲法盜風頓息陞刑部主事歷官江西叅
政分守湖西道奸民請開礦部檄至覆寢其事衆議
建魏忠賢祠士相持不可請蠲袁州積逋建義倉積
粟備水旱修城堞興學校奉優旨賜金增秩

臨江崇

祀錄

陳士奇字平人漳州人天啟進士崇禎庚辰分巡嶺北

清介絕俗衣無紈綺食不梁肉嘗藝蔬官齋以自給
屏絕餽遺微服覘守令庭鞫得失一郡畏其神明值
歲除出死囚十七人於庭縱之歸期以開印自詣十
六人者皆如期至一囚弗赴嚴捕之盜走贛令所自
陳曰我無顏再見陳兵憲遂觸石死轉四川學使遇
張獻忠之禍全家殉難

贛州府志

侯峒曾字豫瞻嘉定人天啟進士歷官江西提學叅議
給事中耿始然督賦至監司以屬禮見峒曾獨與抗

禮益王勢方熾歲試黜兩宗生王怒使人誚讓峒曾

不為動江右人頌其公明謂數十年所未有

白志

王養正字聖功泗州人崇禎進士授海鹽知縣累官南
康知府計殲巨寇鄧毛溪熊高一方賴之福王時進
副使分巡建昌時事已不可為養正加意拊循士民
賴以安堵南京覆兵至江西巡撫曠昭棄南昌走列
城望風潰養正乃與布政夏萬亨知府王域推官劉
允浩南昌推官史夏隆合兵力守閱三日有客兵內

應城即破養正等被執械至武昌死之其妻張氏絕粒九日亦死

同上

夏萬亨字元禮崑山人起家舉人累官江西布政使是時江西郡縣多陷萬亨保建昌與王養正同被執死之妻顧子婦陸及一孫一孫女俱赴井死僕婢隨死者十餘人

同上

彭期生字觀民海鹽人萬厯進士歷官湖西兵備道駐吉安既兵至吉安期生力守不支城破走贛州與楊

廷麟萬元吉同守贛州城破冠帶自縊死有弱水山

人詩集

同上

按朱彞尊詩話云期生與楊萬諸公力保孤城死
之日守備楊大器潛收其尸瘞於萬安縣之百家
村仲子孫貽訪其遺骸不得久之鄉人胡樞知萬
安縣事一夕夢先生語曰遺骸在縣境君能歸之
故鄉幸甚會大器之友曾堯景亦以狀白樞樞資
遣之歸葬海鹽說者比之思歸之溫序焉

原跋

王之良字虞卿陝西華陰人由進士累官虔撫西北寇盜蜂起之良簡練營伍修飭戰具得火器新法製造精良築城開隍為守禦計尤加意振興文學相度賀蘭山形勢徙建贛學贛令陳履忠請建廉泉書院從之捐置學田數百畝以贍師生陞兵部侍郎

贛州府志

周燦字光甫吳江人南贛巡撫用五世孫崇禎進士巡按江西時張獻忠已破長沙羽書旁午巡撫郭都賢

杜門束手燦躬率士卒巡視險隘特疏陳兵餉事宜
又以楚疆決裂請勅行間諸臣併力夾擊以保江南
又請南漕二糧各折半以甦民困請止九江分關以
卹商旅惠王準住廣信燦上言廣信瘠壤岩疆如江
右諸藩星列綦布何處再堪位置情詞懇切見西巡
政略所著有澤畔吟

吳江顧樵撰傳

周應期號際五永嘉人由進士崇禎初年備兵九江馭
吏率屬動有法度公庭湛然如水人不敢干以私在

治五年軍安於伍兵安於營農安於野商安於市當

時號稱善治

九江志

葉士彥巢人崇禎進士癸未來巡九江下車歲除矣日夜偵視城內外所轄通吳楚凡隧道險要莫不嚴備是時總兵左良玉鼯卧九江關箱鄉路不通薪炭俱絕士彥密與宴會慷慨陳大義情辭懇切忠憤激揚良玉感愧立起營還武昌士民釃酒相慶時有奉調駐劄遊擊胡以寧恃東廠太監王德化為奧援肆橫

於九江假防禦流賊名招募無賴悍丁為兵陰縱之
劫掠江上往來之人多患之居民亦時被侵擾恟恟
不安士彥條列其狀請於督師袁繼咸逐之去在任
撫綏瘡痍軫念疾苦備極周恤及士彥歸民皆巷哭
同上

王相說泰州人進士初任袁州推官明於審斷案牘無
留惠政甚多內擢為監察御史推補江西督糧叅政
宗禎末流寇益熾相說轉餉給軍水陸無匱左良玉

兵南下恣肆淫掠相說委曲開諭怵以禍福左兵稍戢漕運獲安

袁州府志

國朝

劉武元字柱國遼東人幼習韜略挾策歸

太宗於瀋陽遂從入關順治四年為南贛巡撫時下贛驍將多恣橫諸監司不能制武元申明令甲嚴輯部伍殘黎獲安戊子江西提督金聲桓副將王得仁反率衆圍贛武元與總兵胡有陞協力堅守民無叛志數

閏月聲桓撤兵還出奇師襲敗之於大蕪港李成棟
自廣擁衆數萬將薄城下武元密遣將夜出攻其不
意斬級萬計成棟走衆潰遂滅隨分遣諸將擊諸郡
邑蜂寇皆平之後以病乞休

白志

遲變龍滿洲人為江西左布政時封疆初定變龍招集
流離加意撫綏歸業者無虛日順治戊子金聲桓王
得仁據城叛變龍以大義叱之遂遇害闔門殉者數
十人

崇祀錄

金震出字鳴遠湖廣江陵人順治三年叅藩嶺北時贛民僅存子遺而兵卒猶拷詰財物震出至力請諸將禁止又勸各營釋歸難婦城內外白骨成邱橫屍塞路捐資瘞埋不可數計虔人至今頌之

贛州府志

胡有陞滿洲人順治初為南贛總兵金聲桓叛率兵攻贛城幾拔有陞與虔撫劉武元悉力拒守閱五月城中糧盡而撫勵士卒雖饑疲無叛志久之聲桓撤圍去追擊大蕪港殲其大半

同上

陳安國沔縣諸生順治間為九江分守道屬邑多荒賦民不能供安國力請減免以數萬計百姓德之

湖廣

通志

夏一鶚滿洲籍寧遠衛人貢士順治八年巡撫江西時封疆未靖九仙山陳九思宜黃曾明等負固出沒諸縣告急一鶚分地設防示以方略勦撫並施諸賊俱殄兵後田多荒蕪更有批政一鶚劾去墨吏二十餘人計墾地多寡以清糧稅招集流亡給還產業民得

所歸

崇祀錄

莊應會號素鶴武進人進士順治初歷官江西右布政
入覲陳奏瑞表二府地隘土瘠自明洪武以來賦斂
較他郡倍重又洊經兵燹戶口少而糧額多積逋日
甚請加軫恤得

旨蠲免二府浮糧一十三萬六千有奇民困以甦江西
之人至今德之內陞刑部侍郎

同上

蔡士英號魁吾錦州人以從龍功擢右副都御史順治

九年出撫江右勘實荒田請免逋賦五十八萬餘缺
丁五十九萬餘又據郡志請減瑞州浮糧一十萬四
百餘石袁州每畝浮一斗六升有奇請減昭新喻九
斗三合科糧以蘇積困疏上報可陞總督漕運晉秩
大司馬以勞致疾請告歸卒謚襄敏所著有撫江集

督漕奏議

安志

郎廷佐字一柱遼東人由翰林學士巡撫江西一切秕
政釐剔務盡未期年而境內大治旋擢兩江總督已

亥海寇猖獗江南震恐廷佐出方略定密計禦之親
冒矢石將軍以下咸奮勇先登事平諸所株連從賊
涉矜疑者盡釋之兩江士民焚祝不忘旋以請告歸
乙卯起補福建總督卒於官

同上

佟國器字滙白遼東人順治乙未巡撫南贛海氛方熾
劇賊曾拱辰據興國之梅窖坑受孫可望偽檄剽掠
吉贛二郡國器遣左雲龍洪起元等重兵圍剿經年
乃滅長寧黃鄉賊楊興自前院劉武元時受撫復叛

潮惠贛數邑之交中有大帽山綿亘數百里良民雜處蒐雉為難乃殲其渠魁招輯餘衆又平寧化白扇坑三村黃素禾諸盜由是江廣閩楚間賊略盡先是贛漕米裒解南昌而贛鎮兵食又自省會撥饋灘石槎牙上下俱病轉輸國器疏請留贛漕以給鎮兵即將省會應撥饋贛之米抵漕兵民兩便運調不煩時重兵宿贛日久議興屯佐軍食國器曰政貴因地行屯於贛無益遂罷之所著撫虔奏疏洞達時變陞副

都調浙撫虔人生祀之

熊文舉碑記

蘇弘祖字光啟遼東遼陽中衛官籍由舉人為啓心郎
順治間歷官左僉都御史撫虔南時廣寇李玉廷劫
擾雩都降而復叛者再至是凡三亂弘祖遣將指畫
方略擒戮之時嶺北掃定已十餘年而文教未洽學
宮鞠為茂草弘祖捐俸倡建文廟規製鉅麗又建啟
聖祠王文成祠嘗手輯經世名言為目十二條又著

有撫虔草

贛州府志

張鳳儀字瑞梧遼東生員順治丁亥分巡嶺北以輯悍卒恤殘黎為事招徠流亡俾之復業戊子金王叛舉兵圍贛鳳儀與虔撫劉武元總鎮胡有陞竭力守城圍數月不解城中糧匱米一石四十金諸將或言老弱無力登陴分糜軍食不若盡戮居民誓死固守鳳儀曰諸君欲反耶民所往謂之王無民是無天子也王者之師攻城猶不可屠敵民况守城而屠我民乎虔撫是其說未幾援至一郡獲全

同上

許世昌字中軒遼東人巡按江西宅心平恕率屬清廉
日汲汲以興利除弊為已任釐剔軍屯兵民兩安平
反冤獄聽斷如神至於學校祠宇罔不修葺吏畏民
懷頌聲洋溢西江百姓至今祠祀之

南昌府志

王庭字言遠浙江嘉興人順治己丑進士授廣州知府
從征平定東粵擢廣西副使督學四川晉按察使己
亥任江西右布政庚子充武闈大總裁所拔皆才技
兼優者南昌瑞袁三郡久困浮糧瑞袁已經巡撫疏

請蠲除獨南昌以省會屢受兵燹圖籍毀廢不得邀
例豁免壬寅入覲庭剴切面陳已得部覆而中沮士
民戴德為立生祠補任山西以裁缺乞歸卒年八十

有七

采王沆行狀

湯斌字孔伯河南睢州人順治壬辰進士選庶吉士授
檢討出為潼關道副使十六年陞嶺北叅政居官以
古人風節自勵值海寇鄭成功犯江寧遣謀至贛問
里不逞思與為應斌捕得立斬之有李玉廷者踞山

為盜其衆逾萬斌諭降之甫為約而海警至斌言於
虔撫蘇弘祖曰玉廷詐降非心服也今必變變則先
加于南安空城無兵請疾往為守禦計設備畢而寇
果至城不可犯則散兵焚掠鄉里為官軍所擒嶺嶠
以靖平南軍過南安殺人以逞有司以鬪殺論斌曰
力侔者謂之鬪軍無寸傷而民以兵死與律不應軍
卒抵法逾年念父老遂乞假歸

黃宗義神道碑

施閏章字尚白江南宣城人順治己丑進士由比部郎

視學山左歲辛丑陞江西叅議分守湖西愛民禮士
尤崇獎風教於袁重建昌黎書院于吉葺白鷺書院
課諸士延泰和郭林為主席甲辰會講青原山中摹
顏書祖關二字建右坊更書聖域二字建左坊於五
賢祠前建傳心堂翼以二樓左曰仁樹右曰見山藏
書以待四方來學者裁缺歸里己未由博學鴻詞科
改官翰林院侍講著有愚山集行世

墓誌

劉捷字公愚北直大城人順治丙戌進士考選給事中

出為平陽道副使康熙九年任江西布政使壬子歲
災南九二郡特甚捷親往賑濟收兌錢糧主藏吏以
羨餘進曰此成規也捷曰官則自私耳何成規之有
屏不納癸丑入覲疏請蠲南昌府浮額糧下部未覆
明年春陞太常卿在道聞江西寇亂疾驅而至時人
心洶懼見捷至咸迎馬首呼曰劉公至吾屬無憂矣
故事藩伯既擢交代不必待新任而糧道姚啟盛先
署藩篆力任事趣捷行捷持不可即日授印視事庀

餉籌兵多方固圉江城賴以定累官至刑部尚書

安

志

哲爾肯滿洲人康熙乙卯總兵南贛耿逆叛其黨盤踞
昌雲間與汀州偽將劉應麟興國屯弁朱明相犄角
勢甚張爾肯與戰以所獲賊幟令我兵執以進賊不
辨掩擊大破之又明年韓大任據吉安自雲都分坑
渡河攻鷓鴣老新二寨斬數百級時閩楚粵諸寇蜂
起餉道梗爾肯力復萬安泰和二縣江西糧運遂通

後陞廣西提督

贛州府志

郭景昌字瑞旭遼東瀋陽人康熙十四年任湖西道時
王師駐勦韓大任景昌理軍需不擾民而調給無悞及
賊棄城遁主帥憤其連歲不下將屠之景昌力請得
免復捐金贖男女被掠者吉舊食南鹽民苦派餉詳
改淮引餉歸於商漕運為分別軍民以除板累吉人
至今德之

吉安府志

邵吳遠字戒三浙江仁和人由進士康熙十四年視學

江右時軍興士民離竄吳遠協贊軍府密謀多方招徠捐設試場士子至者隨其後先輒試之甲乙既定進諸生與論文擁座肩相摩愉愉如家人父子雖盛寒暄竟日無倦容按郡所至聞巖穴之英常造廬就見焉兵戈久列郡學多廢按試皆居城外及再任十
三郡學宮悉為重修建昌士人妻被擄掠者訴之即傾囊以贖云

崇祀錄

李士禎山東昌邑人貢士康熙二十年巡撫江西有介

操多所興除尤慎刑獄民以不寃前為分守湖東道
時藩商虐踞建昌強貸民錢歲息不入則擒而折辱
之民傾產鬻妻子不給往往自盡行部至南城諸生
趙由忭率兩學叩馬訴之士禎覽牒歎息泣下力請
於大吏驅商出境郡人至今頌之

同上

姚啟盛字際斯遼東杏山人以刑科給事分巡贛南先
是贛城數被火災啟盛教民造綆缶畚揭之具以救
之城東小山曰火燄浚大井於達路覆之以閣命名

天一義取相制啟盛復增修之火患衰息又於十八
灘設艇拯溺革雩都大當之派積困以甦陞江西督
糧道歷布政使卒於官

贛州府續志

李光座號東園河南祥符人順治己丑進士歷任江西
按察使值滇湖叛變郡邑煽動上變者多株引無辜
為奸利光座廉得其狀摘主名者寘於理所全活不
可勝計故事對簿訖獄詞皆具於掾吏官受成而已
光座綜次爰書一皆手勘必求無憾乃已
順憲七年

以勞嬰疾卒

同上

白色純字素公遼東人由理事官歷陞江西巡撫時閩粵煽亂南贛騷動賊得民率割其辮將吏遇短髮者輒僇之民陷賊皆不敢自拔又賊多營城外百姓不得逸出兵至賊走見民皆以為賊也多俘其妻女民益駭色純時駐贛州愀然曰若不禁止民且胥化為賊將拜疏以請或謂若是將何以別奸細又得無真賊而并邀寬政者色純曰彼賊欲陰行探豈不能使

有辯之人而顧以此自露形跡耶竟疏上得報可民
脫身歸者相屬賊勢遂孤卒致底定甫一歲卒官

同

上

李月桂字含馨關東人以貢生授忻州歷任江西督糧
道值滇閩煽亂大兵雲集會省百姓流離者不可勝
數月桂首倡捐資又時出倉米賑活饑民招集逃亡
之衆江漕扼敝自國初至今十七道仕者視為畏途
月桂獨久任嘔心釐剔卒于官

同上

于成龍字北溟山西永寧人初任廣西羅城令猛民嚮
化由卓異累陞湖廣武昌知府平定黃金龍何士榮
諸寇亂遷福建按察使郡人延岸遮送至九江者數
萬歲庚申巡撫直隸明年總督江南江西翦除豪吏
大猾隱蠹舊弊神明洞察郡邑條具便宜皆為興舉
嘗中夜苦饑索少米作糜不得遂笑而起視事達旦
上下餽遺都絕吏民安恬商旅輻輳關市流通每一
令出父老扶觀有讀之垂涕者越三年以勞瘁卒官

牀頭敝笥中惟綈袍一襲鞞帶二事堂後瓦甃米數斛鹽豉數器而已江寧人為立祠於清涼山卹贈太子太保謚清端蔭子入監讀書

陳說巖午亭文編

宋犛字牧仲商邱人權闕贛州除門征蠲舟筭平權度商旅樂之後歷巡撫再莅江西時楚中兵亂江西民有與賊應者人情洶洶犛聞命星馳赴任密訪通賊者置之法全省乃安為政先表章風節勅立理學名賢忠節名賢二祠葺徐孺子祠各為文以記之又續

白鹿洞書院學規頒發多士奉為楷模在任五載調

撫江蘇

宋少師神道碑

查培繼字勉齋海寧人順治壬辰進士由科員出為饒
九南道時寇亂初靖培繼力事拊循尤以興學校敦
教化為首務建義塾禁淫祀慎廬課捍水患拯饑民
捐俸修白鹿洞書院時時與諸生講學興賢育才造
就實多既報最有期三郡士民為建講堂培繼力辭
弗獲乃改講堂為希賢書院取自漢以來官於三州

者得十四人而祀之自為記復捐俸置田令諸生肄業其中詳具書院志

西江官蹟

丁煒字澹汝福建晉江人分巡南贛贛固以產穀名民間米艘下流郡有陋例適藩檄行郡徵其稅以代定南協餉牙役藉以需求煒隨摘地方十弊請上官禁革雅善詩著有問山涉江諸集於使院構覽園致嘉樹石與一時名流唱和

贛州府志

陳平字等奇海澄人始從遵義侯討海寇定金厦二門

歷功陞左都督屯萬安田會三藩叛四方騷動萬安
崔符亦聚黨數千殺官吏據城郭以應平率官兵攻
萬安城克之斬渠首以獻錄功加二等是時撫建廣
逼近閩浙吉安為長沙肩背官軍之在信州者遂致
饋糧不繼制府以信餉屬平平悉力輓輸往返無踈
虞軍帥知其才調隨征湖南至袁州而吉安城陷乃
以平為分宜留守彈壓吉賊又隨征龍泉賊斬首無
算晉榮祿大夫調駐劄江城總鎮南瑞六州軍事卒

年六十

賜祭葬廕襲世職

熊一滿撰傳

馬如龍字見五綏德人康熙舉人由浙江按察使擢江西巡撫每冬日設粥廠數處以賑貧民無食者建豫章書院倣白鹿洞遺法造士不倦卒於官

賜葬祭祀名宦

陝西通志

王曰曾溧陽人進士督糧江西深悉漕政之弊釐其科條多所豁免漕項公銀無纖悉歸索者嘗疏河道以

利漕船歷年辛苦守益堅卒官幾不能斂同官為舉其喪焉

崇祀錄

鄭昱湖廣黃岡人進士督糧江右凡四年故事造丁大造小修行月等銀皆按時給假手從事昱特許先期又召至親授吏無染指而艘皆堅完康熙三十八年截留江西漕糧十萬石於江蘇部追弁丁行月銀再四泣請卒免追賠攝學使篆優書院讀書者廩給釋諸生冤獄甚衆

同上

劉蔭樞字相斗韓城人康熙進士由給事分巡南贛道
居官仁心為質冰蘖自矢出於天性毀淫祠興學校
鉏豪橫抑奢華贛俗為之大變贛舊有牙帖銀協濟
定南大為民病蔭樞計歲入置田以租充額牙稅永
除又有私收門稅蔭樞悉除之修鬱孤臺建講堂尊
經閣於山下以課士清忠祠以祀趙清獻文信國二

公累官貴州巡撫

陝西通志

喬士容字德元猗氏縣人康熙丁未進士由禮部郎中

為江西督學道萃諸生白鹿洞中擇學行兼至者主
教事買田以供廩餼士咸懷之

山西通志

劉琰字介菴山東陽穀人康熙戊辰進士視學江右杜
絕苞苴各郡文廟禮器樂舞缺略者修舉之從闕里
采聖門禮樂統一書刊布各學舉業外另試詩古文
辭尤究心理學日以立品敦行勗勉多士秩滿去幾
不能治裘巡撫郎廷極率屬捐俸以資其行

白志

李基和號梅崖遼陽人康熙癸丑進士選庶常散館授

部職出為雁平叅藩轉湖北布政使陞江西巡撫時
方大侵基和在武昌聞命先偵知之貸銀若干過湖
口賈艘方載粟下江即官買之或更邀之轉左蠡入
南昌米價頓平而自買之穀則徧發諸郡為粥以賑
饑全省慶更生於是革陋規禁火耗平鹽價數月之
中善政畢舉

同上

張畧湖廣應城人癸丑進士康熙四十三年司江西鹽
驛動持大體重建楊子洲塔滕王閣災獨力重新之

比舊加壯麗觀風十三郡加意人才

崇祀錄

王承烈字遜功號復庵涇陽人康熙進士翰林檢討雍正四年由湖北糧道擢江西布政使為政寬簡凡所施設一本至誠而爬搔奸竇胥吏屏息舊有通吏二人擅竊威柄承烈斥弗用諸弊澄清推賢好士若恐不及歲餘陞左副都御史累官刑部右侍郎承烈天資剛毅其學粹然閩洛所著有日省錄毛詩解尚書

今文解

陝西通志

高璜字渭師遼陽人鑲黃旗籍康熙庚戌進士改庶吉士歷江西學道時文風卑靡璜力振之即以江西先正陳羅章艾之文式訓一時人士咸嚮古學有起衰八代之頌兩試悉拔單寒老宿榜出歡填衢巷尤恤貧生量給學租羨餘又捐俸修建南昌府學及各郡邑學之廢壞者白鹿書院徐孺子亭俱加修葺善政甚多碑記具存內陞翰林院侍讀

崇祀錄

江西通志卷五十八